

16,392.


CYSTITIDIS CRUPOSÆ,
RETROVERSIONEM UTERI GRAVIDI
SUBSECUTÆ,
CASUS SINGULARIS.

6736
Q 165

SCRIPSIT

J. G.

Boris Rosenplänter.



1860
CYSTITIDIS CRUPOSÆ,
RETROVERSIONEM UTERI GRAVIDI SUBSECUTÆ,
CASUS SINGULARIS.

DISSESSATIO INAUGURALIS

QUAM
CONSENSU ET AUCTORITATE
GRATIOSI MEDICORUM ORDINIS
IN
UNIVERSITATE LITERARUM CAESAREA
DORPATENSI

A D G R A D U M
DOCTORIS MEDICINAB
RITE AD PISCENDUM

LOCO CONSUETO PUBLICE DEFENDET

AUCTOR

Boris Rosenplänter,
RIGENSIS.



DORPATI LIVONORUM,
TYPIS HENRICI LAAKMANNI.
MDCCCLV.

VIR○

ILLUSTRISSEMO, HUMANISSEMO,

PRÆECEPTORI SUMME VENERANDO

I m p r i m a t u r

haec dissertatio ea conditione, ut, simulac typis fuerit excusa, numerus exemplorum lege praescriptus collegio tradatur ad explorandos libros constituto.

Dorpali die 22. mens. Apr. a. 1855.

(Nr. 100.)

(L. S.)

Samson,
ord. med. h. t. Decanus.

P. U. W A L T E R,

M. D. PROF. ORD. UNIVERSIT. LITER. CAESAR.

DORPAT., A CONS. PUBL.

ETC.

PIO GRATIQUE ANIMO

OFFERT

AUCTOR.



PRÆPARATIO.

Inde ab anni 1854 semestri altero inēunte in nosocomio obstetricio, quod hic Dorpati est, medici auxiliarii munere fungens primo statim initio occasionem nactus sum, in instituto illo quendam summi momenti casum observandi. Qui casus cystitidem cruposam, uteri gravidi retroversionem secutam, obtulit; in qua quum, uteri repositione facta, vesicae urinariae exsudatum membranae magnae forma detrusum atque per urethram propulsum esset, denique aegrotanti perfectam sanitatem restituere contigit. Cujus casus descriptionem ut dissertationis inauguralis exarandae materiam deligerem, quum jam illo tempore professor Dr. Walter, instituti illius director, mihi auctor existisset, tamen tunc quidem, quod brevi ante ad thema quoddam obstetricium in eundem finem pertractandum accesseram, consilio illi non obsequendum esse censui. Attamen, quum, opera per quattuor hebdomades nequidquam insumpta, propterea quod litterarum ad illam commentationem conscribendam necessariarum partem, praesertim auctorum anglicorum scripta, mihi comparare nequieram, a materia illa tractanda absistere coactus essem, ad morbi historiam, quam dixi, descri-

bendam me accingere in animum induxi. Qua in re tamen hoc erat incommodi, quod nescio an in observatione prius instituta quaedam animi mei attentionem fuderint, quae, siquidem jam ante, quum casus illius observandū occasio oblata erat, eum aliquando describere propositum habuisse, majore cum diligentia curaque contemplatus essem. Quae eadem est causa, cur mihi lectoris benevoli excusatio expetenda sit, quod inter alia verbi causa urinae analyses, quae diversis, dum morbus decurrit, temporibus suscipienda erant, in opusculo meo omnino desiderentur.

Superest, ut professori Bidder, viro summe venerando, qui in exsudato cruposo ope microscopii disquirendo et consilio et auxilio suo strenue mihi adfuit, atque professori Walter, praeceptorи illustrissimo, qui, bibliothecae suae copiosissimae ad quaestionem meam utendae mihi potestate facta, rem meam haud parum adjuvit, palam nunc toto animo debitas gratias persolvam.

Etiamsi auctores recentiores, uti Rokitansky, Kiwisch, Henoch, ejusmodi processus cruposos in vesicae urinariae membrana mucosa reperiri posse, haud negent, tamen casus, quem mihi enarrandum sumsi, quum inter rariores habendus sit, sine dubio dignus est, qui uberius describatur. Rokitansky enim, quo loco¹⁾ de inflammationibus cruposis disserit, eas exsudato quodam plastico excellere affirmat, quod, soliditatis ratione habita, inter floris lactis spissitudinem indolemque corii ad instar lentam varians, membranam mucosam nunc hic illie ad insularum similitudinem, nunc majore extensione velut indumentum pruinae simile, nunc, idque casibus exquisitis, coaguli membranacei instar obtegat. Loco altero²⁾, quo vir doctus de cystitide cruposa verba facit, processum istum, rarius per vesicam urinariam totam vel per majorem ejus partem extensem, longe crebrius nonnullis locis contineri exsudatumque tunc vel macularum subrotundarum vel striarum speciem prae se ferre contendit. Quibus ex verbis tum, quam raro productum cruposum eadem, qua membrana est, soliditate praeditum inveniatur, tum, quam raro illud adeo extensem cernatur, ut universam totorum organorum membranam mucosam obducat, luscilenter appetat.

1) Handbuch der pathologischen Anatomie von Carl Rokitansky. Wien 1842. Vol. II p. 56.

2) I. c. Vol. III p. 455.

Kiwisch¹⁾) casum quendam ei, quem ego exposturus sum, simillimum solam eam ob causam, quod rarissimus esset, in medium protulit, quem casum, infra locus erit, ubi fusius enarremus. Henoch²⁾ quoque, ubi de cystitide agit, exsudatum cruposum strata magis minusve crassa, vel membranacea vel gelatinæ similia, offerre atque in vesicae urinariae membrana mucosa plerumque vel macularum vel striarum forma depositum reperiri tradit, perraro id membranam cohaerentem ac continuam efficiens totam vesicae membranam mucosam obtegere adjiciens. Qua in re tum casum illum a Kiwisch observatum, de quo jani mentionem intuli, tum casum alterum perquam similem, a Zeitfuchs³⁾ prolatum, de quo et ipso infra exponam, exempla refert, ex quibus appareat, quamvis raro, at evenire tamen, ut tales membranae continuae totam vesicae urinariae membranam mucosam obducant. Utriusque casus, quemadmodum infra videbimus, is sicut existus, ut membranae cruposae, sat insigni magnitudine praeditae, per urethram protruderentur. Loco quidem modo allato Henoch de casus utriusque observatione vera justaque omnino non dubitare videmus. Paulo inferius, quo loco de membranarum cruposarum post cantharidum usum origine commemorat⁴⁾, teste Morel Lavallée (Morel Lavallée in l'Experience Juli 1844

1) Ueber primitiven Blasencroup in der Prager Vierteljahrsschrift für die praktische Heilkunde 1844. Quart. II.

2) Constatt's specielle Pathologie und Therapie. V. (Supplement.) Band von Dr. E. H. Henoch. 1854 p. 582.

3) Meissner's Frauenzimmerkrankheiten 1843 p. 720 und Journal f. Geburtsb. etc. von E. v. Siebold. Vol. XIII p. 99.

4) I. c. pag. 583.

et Revue med. Juni 1847, Albers in Rhein-westphäl. Corresp.-Bl. 1844 no. 19), cantharidibus applicitis, frequentes urinae mittendae impetus ac dolores post mitum existere, atque pseudomembranas conglobatas provenire ait, quarum ambitus inter franchi dimidiis et scidae lusoriae dimidiatae magnitudinem varietur.

Quibus propositis, Henoch adnotationem adjungit, in qua haec verba leguntur: „So grosse Membranen können unmöglich die Urethra passiren und Troussel (Gaz. des Hôp. 1846 no. 57) hat daher ganz Recht, wenn er annimmt, dass sie sich erst ausserhalb des Körpers in dem mit fibrinösen Stoffen überschwängerten Urin durch Gerinnung niederschlagen.“

Itaque, quum Henoch hoc loco verbis disertis fieri posse neget, ut membranae, quarum eadem sit magnitudo, quae scidae lusoriae dimidia, urethram permeent, sane manifestum est, virum doctum sibi parum constare, quippe qui antea casus a Kiwisch et Zeitfuchs prolatos, in quibus etiam majores membranae propulsae esse dicuntur, non censuerit in dubitationem vocandos esse. Quae discrepantia licet tollatur, si Henoch de viri urethra dicere crediderimus, tamen illi tum diserte hoc adjiciendum erat, namque, quum paulo ante de cystitide cruposa uteri retroversionem sequente mentionem fecerit, per se id neutrum intelligi potest.

Ex iis, quae modo attulimus, casus eos, in quibus pseudomembranae majores vel per urethram expellantur, vel, non protrusae, totam vesicam urinariam intrinssecus vestiant, inter rarissimos referendos esse, evidenter appetit. Certe Henoch in opere suo modo

allato, nuperrime in publicum emiso, non nisi duos casus profert.

Evidem, litteris, quae huc pertineant, perlustratis, inde ab aetate, qua Reinick¹⁾ dissertationem suam conscripsit, usque ad tempora recentissima quattuor casus inveni, quorum tres haud dubie, unus summa cum verisimilitudine huc trahendi sunt. Qui casus quattuor post uteri gravidi retroversionem observati sunt, id quod tanto majoris momenti est, quoniam uteri, praesertim gravidi, dislocationes creberrime cystitidis cruposae ansam praehere certum atque exploratum est. Quasdam similitudines quintus etiam casus offert; quae analogiae tamen quum non tam multae sint, ut casus iste uno cum quattuor illis ordine proferri queat, eum quidem appendicis loco in ipso commentationis fine proponendum esse censui.

Quam modo commentationem attuli a Reinick conscriptam, ea jure ac merito pro illo scripto habetur, in quo omnium primo, quamquam nomine falso, de uteri retroversione agatur; quam dissertationem tamen qua causa adducti auctores quidam, uti Petr. Frank²⁾, Mende³⁾, Richter⁴⁾, Hussian⁵⁾, Kulmianam di-

1) Diss. medica de uteri delapsu, suppressionis urinae et subsequatae mortis causa, quam praeside J. A. Kulmo tuebatur J. E. Reinick Gedani m. Aprili 1732 in des Herren Albrecht v. Haller auslesene chirurgische Disputationes, in einen Auszug gebracht von Fr. A. Weiz. Leipz. 1782 Vol. III no. 86.

2) Mende's Beobachtungen und Bemerkungen aus d. Geburtshülfe und gerichtl. Medicin Göttingen 1823, pag. 150.

3) l. c. pag. 162.

4) Hufeland's neues Journ. Vol. LXIII Ed. 4. Beobachtungen einer Retrov. uteri gravidi v. Dr. Sibergundi in Dorsten p. 111.

5) Hussian's Handbuch d. Geburtshülfe. Wien 1827 Vol. II p. 8.

cant, equidem perspicere non possum. Solus omnium Leonidas van Praag¹⁾, qui observationibus suis tractatum historicum de uteri retroversione diligente ratque accurate scriptum praemittit, Reinick, non Kulm, primum uteri retroversionem et observasse et descripsisse ait.

Haec equidem non omittenda esse judicavi, ne quis in eum deduceretur errorem, ut scripta diversa a Reinick et Kulm edita esse putaret, simul, quantum in me esset, ad id conferendum ratus, ut in locum nominis illius falsi verum substitueretur.

Priusquam vero casum mihi oblatum enarrem, quattuor, quas commemoravi, morborum historias paucis ac breviter proferre liceat; qui quidem casus a Zeitfuchs, Baynham, Kiwisch, Wittich publici juris facti sunt.

I. *Quaedam de casu a Zeitfuchs anno 1830 observato excerpta²⁾.*

Mulier quaedam quarto graviditatis mense sibi uteri retroversionem contraxerat; quo facto, quum intra dierum 12 spatium sexies uteri repositio tentata esset, haec tamen in septimo conatu demum feliciter successit. Per omne id tempus ope catheteris urina admodum decomposita sanguineaque, quae odorem foetidissimum spargebat, emissa est. Inde, simulatque uteri

1) Einiges über Rückwärtsbeugung der Gebärmutter von Dr. J. Leonidas v. Praag zu Leyden, in: Neue Zeitschrift für Geburtshütung etc. von Busch, v. Ritgen, v. Siebold 1851, XXIX. II p. 219.

2) Ein Fall von Retroversio uteri gravidi, beobachtet und mitgetheilt von Dr. Zeitfuchs, praktischem Arzt in Frankenhausen in: E. v. Siebold's Journal für Geburtshütung etc. Vol. XIII. p. 99.

repositio contigit, completa urinae incontinentia exstitit, quae quinque hebdomades integras durabat. Qua in re urethra inde ab orificio externo usque ad locum, quo in vesicam urinariam abit, inflammata atque ejusdem crassitudinis erat, qua est digitus minimus, Nymphae, quae oedematose intumuerant, pollicem et rima pudendi prominebant. Tres hebdomades et urina indolem suam morbosam servabat et dolores in urethra atque vesica urinaria percepti durabant. Vicesimo inde post repositionem die observatori phaenomenon miratione dignissimum in conspectum venit. Etenim e genitalibus membrana convoluta, colore albido tincta, pedem dimidium longa, prodit, quam investigatio diligenter instituta ex urethra provenisse docuit. Quae membrana quum aliquoties etiam circum se ipsam contorta esset, ejus finis, qui aliquot pollices aequabat, ex urethra protractus est. Deinde, quum haec pseudomembrana in vase aqua pura impleto explicata esset, eam apparuit tantae esse magnitudinis, ut necesse videretur, illa totam vesicae urinariae superficiem interiorem obductam fuisse. Eadem magna concrementorum urinæ subtilissimorum copia obiecta cernebatur. Aegrota illam vehementissimis nisibus ediderat.

Inde ab illo die tum urinae indoles magis magisque ad normam rediit, tum urethrae intumescentia minor minorque exstitit, ita ut aegrota sensim ac paulatim saltem in aliquot sexagesimas urinam continere posset. Denique, quinque hebdomadum spatio circumacto, perfecta ex omni parte convalescentia, et postea non turbata, incepit. Foetus, per tempus normale gestatus, in lucem est editus.

Huic casus descriptioni epierisis subjungitur, qua

auctor affectionis symptomata illustrat, membranam illam, quae expulsa erat, pro exsudato plastico habendam esse existimans, quo reactio vehementissima in nervis vasisque orta ad crisim pervenerit. Hoc in casu, id quod magnopere doleo, microscopium in usum vocatum non est.

II. Quaedam de casu anno 1828 a Baynham observato excerpta¹⁾.

Hic ille est ex casibus quattuor, quem supra jam admenui non quidem certo, at summa tamen cum verisimilitudine ceteris adjungi posse; quod judicium qua de causa faciam, ex ipsa casus descriptione patebit.

Hoc quoque in casu, quo mulier sextum (!) mensem gravida erat, urina ante uteri repositionem ope catheteris emissâ valde decomposita fuit, quae quidem prope ad puris ex abscessu m. psoae emanantis speciem accessisse dicitur²⁾, eo tamen discrimine intercedente, quod aliquanto foediorem odorem diffuderit.

Post uteri punctionem demum, quam, horis viginti quattuor exactis, abortus secutus est, reponendi uteri conatus successum habuit, qua repositione facta, urinæ incontinentia ingruit, quae, quinque hebdomadibus elapsis, denique omnino cessavit. Urinæ odor foetidus non prius, quam mense circumacto, evanuit. Saepe majores lymphæ coagulatae copiae excernebantur. De membranae expulsione haec leguntur: „es gingen in

1) Beispiel einer Zurückbeugung der schwangeren Gebärmutter, wo der Gebärmutterstich mit Erfolg angewandt wurde etc. v. Baynham in Birmingham in: E. v. Siebold's Journal für Geburtshilfe etc. Vol. X pag. 372, ex: Edinb. med. and. surg. Journal April 1830.

2) I. c. p. 373.

abgesonderten Zeiträumen vier Stücke einer regelmässig organisirten Membran ab, die man fälschlich für Theile der Blase hielt, die jedoch nur der Vagina angehörten.¹⁾“

Membrana expulsa, paulatim convalescentia incipit, quo facto quum circiter sex hebdomades elapsae essent, aegrota omnino sanata e nosocomio dimissa est. Mihi Zeitfuchs in commentatione supra allata recto judicio teneri videtur, quod de membrana in casu a se observato per urethram propulsa disserens his verbis utitur²⁾: „bei dieser Gelegenheit sei mir erlaubt, auf einen Irrthum aufmerksam zu machen, in welchem Hr. Baynham, der Erzähler eines neueren in Birmingham vorgekommenen Falles (Siebold's Journal für Geburtshülfe etc. Band X Stück II), welcher in der Genesungsperiode mit dem unsrigen die grösste Aehnlichkeit hat, besangen ist. Hier, wie dort, gingen unter fast gleichen begleitenden Umständen Pseudomembranen aus der Schamspalte ab. Der Verfasser jener Krankheitsgeschichte sieht nun die Vagina für die Geburtsstätte jener Membranen an, aber gewiss nur aus Mangel an Autopsie, zu welcher sich in meinem Falle die günstigste Gelegenheit darbot.“

Hanc igitur ob causam, quod sententiae, quam Zeitfuchs de casu a Baynham observato protulit, subscribendum esse arbitror, equidem hunc casum, quamvis secundum ipsius auctoris opinionem, nisi forte is tempore posteriore sententiam suam mutavit, huc referendus non sit, inter reliquos tamen casus propo-

1) I. c. p. 376.

2) I. c. p. 125.

nendum esse existimavi, in quibus exsudatum membranaceum ex vesica urinaria provocerat vel ipsius vesicae strata propulsa fuerant. In omnibus autem casibus quattuor vesica urinaria, non vagina, mali sedes fuit.

Ut vero sententiae a Zeitfuchs defensae adstipuler, ea maxime causa adducor, quod ejus modi membranae cruposae, in uteri gravidi retroversione obviae, in vesica urinaria produci solent, neque mihi, excepto casu hoc dubio a Baynham observato, ullus alias innotuit, quo vaginalae membrana mucosa in morbo illo talia exsudata produxerit.

*III. Quaedam de casu a Kiwisch anno 1843
observato excerpta¹⁾.*

Qui casus incompletam uteri retroversionem, quam cystitis cruposa subsecuta erat, offert.

Quum uterus dislocatus, repositione saepius facta, semper situm abnormem denuo recuperavisset, interim urinae incontinentia exorta erat, in qua aegrotans, pressu fortiore ad hypogastrium exhibito, urinam cum dolore urente acerrimo mittebat. Catheter, qui non potuerat introduci, nisi vi aliqua adhibita, quum re infecta extraheretur, exsudati sanguinei et purulenti floccis obtetus cernebatur. Urethra magis magisque tumefacta, externum ejus orificium excoriatum exsudatoque cruposo obductum erat. Inde, pudendo externo quoque in mali societatem vocato, in labio pudendi minore sinistro profundum exstitit ulcus, quod exsudato sanioso obiectum erat.

1) Ueber primitiven Blasencroup mit einer Beobachtung mitgetheilt von Dr. Kiwisch Ritter von Rotterau in: Prager Vierteljahrsschrift für die praktische Heilkunde 1844. Quart II p. 37.

Denique, postquam aegrota per aliquot dies summis cruciatibus vexata est, velamentorum punctione effecta, quum fere tres librae liquoris amnii effluxissent, paululum allatum est levaminis. Jam urina paulo minus decomposita appetet; at saepius magni exsudati flocci urinaeque sedimentum granosum excernuntur. Biduo transacto, repente ischuria cum maximo urinæ mittendæ impetu ingruit, quo facto, membranam colore ex albido griseo tinctam ex urethra propendere cognoscitur, quae inde cum aliqua difficultate tota extrahitur.

Quae membrana, duplo major quam vola manus, crassitie 1—3^{mm} aequans, saccum efformat perforatum, cuius forma vesicae urinariae cum urethrae initio speciei respondet. Superficies ejus interna inaequabilis sanie male olente urinaeque crystallis ac sedimentis obtecta est, dum externa paulo aequabilior, colore ex albo griseo imbuta ac floccosa cernitur.

Microscopio adhibito, exsudatum cruposum, quae-dam membranae mucosae vesicae urinariae portiones, pus, mucus, urinae sedimentum observata sunt. Undecimo demum die post velamentorum punctuationem abortu facto, enuresis in melius conversa est, doloribus quoque minutis, et urinæ, quae tamen indolem mucosam servat, reactio alcalina evanescit.

Sex diebus transactis, aegrota urinam jam duas per horas continere potest, neque in mingendo nisi exiguum dolorem urentem percipit.

Tempore posteriore quae mulieris illius valetudo fuerit, id quod dolendum est, nihil certius refertur, unde in incerto relinquitur, utrum ista m. sphincteris vesicae debilitas sensim cessaverit, an et postea perduraverit.

*IV. Quaedam de casu a Wittich anno 1844
observato excerpta¹⁾.*

In femina quadam debili cachecticaque inter tertium quartumque graviditatis mensem, quum gravius onus sustulisset, uteri retroversio exstiterat, quo facto, statim symptomata ista satis nota, quae uteri dislocatione provocantur, in conspectum venerunt.

Medicus in auxilium vocatus quum identidem abortum instare affirmavisset, aegrota eo, quo diximus, statu, subinde etiam mictu cruento accende; amplius tres hebdomades permanebat, quoad vir doctus, qui hunc casum observavit, a medico illo consultus brevi, quod malum adesset, cognovit. Qui ope catheteris magnam urinæ sordidae foetidaeque copiam emisit, in qua permulti flocci natabant, qui aqua submersi in telas membranaceas explicari poterant. Auctor ipse in ea est sententia, ut vesicam urinariam, inflammatione affectam, membrana mucosa detrusa, hic illuc sphacelosam exstisset arbitretur.

Postquam inde uteri repositio tum per vaginam tum per intestinum rectum compluries frustra tentata est, dierum decem decursu, quibus illi uteri reponendi conatus suscepti erant, urina, pure admixto, colorem omnino turbidum lacteumque induit odoremque pestiliosum spargebat. Triduo circumacto, tandem repositio per anum successit.

Eodem die vesperi observator membranam solidam, subgriseam, ex urethra propendentem animadverit,

1) Rückwärtsbeugung der schwangeren Gebärmutter von Dr. M. Wittich in Eisenach in: Neue Zeitschrift für Geburtshilfe von Busch, v. Ritgen, v. Siebold 1847. Vol. XXIII. Taf. 98.

cujs frustum pollicem longum, quum plus extrahi nequiret, desectum est, qua in re aegrota nihil sensus percepit. Quod frustum desectum tunicae muscularis vesicae urinariae partem, et quidem iuferiorem, esse apparuit; id quod observator tum ex membranae crassitudine tum ex fibrarum muscularium admodum tume-factorum ac manifesto prominentium decursu parallelo conclusit. Aliquot horis transactis, horripilatio nisusque vehementissimi ingruerunt, quibus membrana magna cum strepitu simili, ac si obturamentum a dolio resiliat, ex urethra expulsa est. Hora post abortus factus est. Urina jam perpetuo guttatim emittitur. Membrana propulsa saccus est, qui a parte anterieore per verticem ad partem posticam emensus pollices paris. 20, ab altero latere per verticem ad alterum dimensus 29'', expletus altitudine 7'' aequat. Membranae crassities a parte superiore deorsum versus minuebatur.

Deinde observator, quem decursum membranae illius fibrae musculares inierint, accurate describit, qui decursus cum normali muscularorum vesicae urinariae cursu omnino congruit. Tum auctor, per vestigationis suae eventum proponens, haec verba facit: „Es unterliegt demnach keinen Zweifel, dass die beschriebene Membran die durch entzündlichen Process geschwellte und nachher abgestorbene Muscularis der Urinblase, ungefähr bis an den Sphincter, ist“¹⁾.

Ceterum, id quod dolendum est, neque microscopium, neque subsidia chemica in usum conversa esse videntur, ut, hanc auctoris sententiam veram esse, evidenter demonstraretur.

1) I. c. p. 110 und 111.

Cum urina perpetuo guttatim effluente plurimum puris, subinde etiam nonnulli telae emortuae flocci excernebantur. Puris effluvium, magis magisque deminutum, mensis spatio denique omnino cessavit. Mulier jam septem hebdomadibus post tunicam musculariem expulsam negotia sua domestica obire potuit.

Morbi exitus pro rata parte prosperrimus migratione dignissimus est, quum aegrota paulatim facultatem adeptus, urinae per aliquod tempus continenda, tantum, si lotii copia tres uncias excessisset, mictum amplius continere nequissse tradatur¹⁾. Quod phaenomenon manifestum est inde solummodo deducendum esse, quod et m. sphincteris vesicae et m. detrusoris urinae pars relicta fuerit, ita ut parvae urinae quantitates, quae non majores essent, quam quas m. detrusoris fibrae relictae emitterent, jam antequam m. detrusor mingendi stimulum perciperet, fibrarum m. sphincteris reliquiis contineri possent.

Porro femina illa, quum denuo gravida facta esset, partum pertulisse prohibetur, ac postremo auctor duobus, postquam morbus iste primum exortus esset, annis circumactis, quum sibi iterum occasio oblata esset feminam videndi, eam, exceptis quibusdam exiguis excernenda urinae turbis, omnino alacrem optime valuisse narrat. Ceterum, quod sane dolendum est, quo modo quoque gradu urinae excretio turbata fuerit, non certius adseritur.

1) I. c. p. 115.

Casus a nobis observati descriptio.

Kaddri Paesokenne, annos 35 nata, Esthona nupta, corporis statura media, anno 1854 d. m. Septembbris 16. mane, auxilium artis imploratura, ad nosocomium obstetricium Dorpatense accessit. Aegrota, quum meando dolores cierentur, id quod ex facie vultuque plane cognoscere licuit, nisi tarde lenteque incedere non poterat. Post singulos gradus aut subsistebat, aut rem aliquam stabilem, cui inniti posset, apprehendebat. — Sedem dolorum in abdomine atque regione sacrali positam esse retulit, malumque, quo adducta esset, ut auxilium peteret, doloribus istis, cum alvi dejicienda uninaequa mittendae difficultate junctis, consistere narravit. Simul aegrota quartum gravida erat idque mense tertio.

Exploratione deinde suscepta, haec inventa sunt. Abdomen voluminosum atque parte media prominens tere abdomini, quale quinto sexto gravitatis mense se exhibet, simile est. — Spatio amplius pedem dimidium lato pars abdominis media paene ad umbilicum usque percussionis sonum obtusum reddidit et hoc illue moveri potuit, id quod dubium non erat a vesica urinaria nimis opulta atque extensa repetendum esse. Exploratio per vaginam instituta posteriorem vaginae parietem ad partem anteriorem propulsum pauloque superius corpus quoddam rotundum, ad movendum difficile, ostendit, quod, quum pelvis spatium majore ex parte expleret, vaginam haud parum comprimeret necessere erat, ita ut in explorando digitus difficillime praeter corporis illius parietem anteriorem sursum adscendere posset. Portio vaginalis colli uteri nec positionem

nec directionem normalem tenebat, sed situm horizontalem proxime pone symphysis ossium pubis, ore uteri ad symphysis appresso, aliquanto altiore loco, quam solet, obtinebat, unde factum est, ut nisi digito longissimo labium posterius, tunc quidem inferius, attingi non posset.

Anamnesis fere nihil docuit; nam aegrota, quum graviditas antea decursum omnino normalem iniisset, hebdomadibus quattuor cum dimidia, antequam in nosocomium accederet, nocte quadam se doloribus acermiss in abdomine perceptis ex somno excitatam esse prohibet, ad quos dolores paulo post alvi obstructionem et urinae 'mittendae molestias se comites adjunxisse ait. Diebus primis quidem urinam, quamquam post natus vehementiores, guttatum emanasse, postea autem, quotiescumque vesicam urinariam nimis oppletam sensisset, se manipulationem quandam, quam certius indicare non posset, ad genitalia instituere coactam esse, ut parca urinae excretio efficeretur. Ex hebdomadum quattuor spatio se nihil urinae misisse contendit. Prior res graviditates partusque ac puerperia ad normam recurrisse affirmat.

Manipulationem illam, qua sibi urinam mittere contigisse aegrota attulit, verisimillimum est nullam fuisse aliam, nisi qua uteri fundus ad partem posticam decursumque delapsus elevaretur ac reprimeretur, ut scilicet pressio, quam portio vaginalis colli uteri ad urethram exhiberet, si non omnino tolleretur, at certe minor exsisteret. Mulieres hoc morbo affectas, ut urinam emittere possint, tali manipulatione uti, hodie omnibus

notum est, de qua quidem re ex scriptoribus recentioribus Kiwisch¹⁾ mentionem intulit.

Hoc in casu uteri gravidi retroversionem adfuisse, extra omnem dubitationis aleam est positum.

Omnium primum, ut vesica urinaria nimis oppleta evacuaretur, catheterem applicari placuit, id quod sine ulla difficultate majore successit, nisi quod brevi tempore pro cathetere muliebri virilem adhiberi opus erat. Namque, dum illo paucae tantummodo guttulae emitti poterant, hujus ope contra plures urinae mucosae ac spissiusculae turbidaeque, acrem ammonii odorem spar gentis, librae provenerunt. Odor urinae brevissimo tempore per conclave magnum diffusus est, nec non catheteris argentei, ex urethra retracti, pars ea, quae in vesicam urinariam penetraverat, colore nigro tineta cernebatur.

Vesica exinanita, uteri repositio suscepta est, quae quidem facile successit. A vagina enim dum manus alterius digitii duo, vi paulatim adacta, uteri fundum attollunt, manus altera per abdominis integumenta totam operationem sequitur atque observat, ne elevatus uteri fundus ad partem anteriorem transeundat, prohibitura. Quae dum geruntur, femina situm dorsalem horizontalem obtinet. Deinde, exploratione interna facta, operationem institutam optimum successum habuisse cognitum est, quippe qua jam portionem vaginalis colli uteri suo loco, fundumque uteri non amplius loco abnormi, sed aliquot digitis transversis supra symphysis ossium pubis positum esse appareret.

1) Klinische Vorträge über die Krankheiten des weiblichen Geschlechtes v. Kiwisch Ritter von Rotterau. Prag 1845 p. 167.

Operatione, quae vix longius temporis spatium, quam sexagesimam, expostulaverat, ad finem adducta, aegrota sibi multum levaminis allatum esse affirmavit. Tum feminac quiete lateri incumbere jussae, corpore paululum ad partem anteriorem converso, diaeta parca praescripta urinaque hora quaque tertia quartave ope catheteris emissâ est, ut videlicet, quum musculum detrusorem urinae statu paralyticâ esse verisimillimum haberetur, ne urina denuo in vesica urinaria accumularetur, eoque, id quod facile accidere potuit, malum recideret, impediretur. Praeterea potionis loco emulsio amygdalarum dulcium, atque, ut dolores in regione vesicae urinariae etiam perdurantes quam maxime lenirentur, aquae Laurocerasi altera quaque hora guttae 10—15 porrectae sunt.

Aliquot horis elapsis, doloribus nondum finitis, e vagina magna muci spissi lentique quantitas profluxit, pulsu paululum accelerato. Vesicae collum velut paralysi debilitatum videtur, quum interdum brevi post catheteris usum tempore urina, quae contineri nequit, effundatur. Ceterum hoc nonnunquam etiam intervallis inter catheteris immissiones interjectis accidit, catheteris ope solum exigua urinae quantitate emissâ, quae, spatii secretionis horarum 3—4 ratione habita, justo minor est.

D. m. Sept. 17. Aegrotantis status in universum idem est. Ex urethra tela quaedam membranacea, solida, disrupta difficilis, lacera, coloris ex albido grisei propendet, quam, quum haud dubie pars ejus crassior in vesica retineretur eaque crassior esset, quam quae per urethram protrahi posset, nullo modo extrahere

configit. Itaque membranam illam, quum catheter aliter immitti nequiret, hujus ope retro pelli necesse fuit.

D. m. Sept. 20. Nulla ad id tempus mutatione graviore observata, ope catheteris plerumque parva urinae copia emittitur, lotio majore ex parte invita aegrota profluente. Qua re factum erat, ut ad dolores gravissimos in vesica urinaria perceptos insignis quoque genitalium externorum sensibilitas accederet, quae partes quum admodum calefactae tumidaeque et colore rubro imbutae essent, nymphis dimidiam pollicis partem crassis multum prominentibus, quivis contactus in cathetere immittendo necessarius plurimum doloris movebat. Urethra quoque adeo tumefacta, ut digitii minimi crassitiem aequaret, in cathetere utendo multum doloris ciębat. Itaque, quum aegrota ne noctu quidem doloribus careret, inde a d. m. Sept. 18 singulis vesperis ei 10 guttas tincturae Opii simplicis praebendas censui. D. m. Sept. 18 tempore meridiano, dum catheteris ope urina emittitur, sine ulla sanguinis profusione ovulum ex utero provenit. Velamentis placentaque relictis, funiculus umbilicalis, cuius eadem, quae filii, crassities erat, dissecetur necesse est. Foetus sexus virilis, longitudine 5' aequans, caput magnum diruptumque offert, ergo cerebro caret. Intestina ejus ex abdomine disrupto provenerunt, omninoque foetus manifesta putredinis satis proiectae signa praebet.

Ex quo foetus propulsus erat, nec urina sine catheteris auxilio emitte potuit, et dolores magnopere adiucti inde a vertice vesicae initio capto vehementia acercentes usque ad urethrae orificium, ubi quidem gravissim isentiuntur, descenderunt, ita ut hinc conclusio effici posset, vel urethram vel vesicae collum

obstructum esse, qua in re dolor a vesicae vertice ad ejus collum descendens ad urinae mittendae impetum periodice ingruentem se adjunxit. E contrario dolores in regione sacrali percepti leniores exstiterunt, saltem minus sentiuntur. Sub vesperum funiculi umbilicalis reliquiae, at sine placenta, propulsae sunt.

D. m. Sept. 21. Quum urina subinde muliere invita scaturiret, aegrota noctu somno placidiore usa erat. Omnino per totum hoc tempus ischuria et enuresis inter se alternabant. Dolores minores percipiuntur.

Cathetere hora quaque tertia quartave introducto, nunc urina emissâ est, nunc nihil provenit, indeque ope catheteris calefactum Altheae decoctum injectum fuit, quo vesicae membrana mucosa ab urinae acris, valde decompositae, effectu tuta praestaretur.

Ceterum dolorum remissio non diurna fuit, quippe qui jam ita increscerent, ut saepe perferri nequirent, quia corpus quoddam membranaceum, in vesica urinaria situm, nonnunquam, dum mingendi impetus durat, urethrae se opposit, atque, ne urina effundetur, impedivit. Quod si fit, aegrota, dolores tolerare nequiens, magna voce clamitat. Hujus membranae laciniam, fere pollicem ex urethrae orificio propendentem, aegrota nihil sentiente, ope forcis desecui, partem reliquam autem, quum tota membrana extrahi nequiret, ne catheteri aditus paecluderetur, retro pellere coactus eram.

D. m. Sept. 22. Tempore nocturno aegrota nihil somni cepit. Etenim membrana, de qua diximus, rursus in urethram depulsa dolores acerrimos nisusque vehementissimos excitavit, quo res eo adducta est, ut mem-

brana denique, dolorum nisumque spasmodicorum vehementia augescente, hora matutina quinta foras expelleretur¹⁾. — Quo corpore amoto, aegrotantis molestiae aliquanto minores exstiterunt, quae, quum denuo Opii dosim assumsisset, in breve tempus somno occupata est.

Urina, quae hujus diei spatio compluries, aegrota invita, emissa est, jam non guttatum, sed majoribus quantitatibus profluxit, unde factum est, ut catheter saepius immissus semper non nisi paucas guttas detraheret. Quo adde, quod ipsa urina jam non eundem, quem antea, odorem acrem neque qualitates causticas offert, ita ut catheterem non amplius colore nigro imbuat. Praeterea urina liquidiorem, quam antea, sese exhibit. Dolores aliquanto leniores sunt, ita ut aegrota, nullos suspitus edens, quieta ac tranquilla jaceat, nec nisi in cathetere introducendo dolores conqueratur.

D. m. Sept. 23. Aegrota, noctu somno placido usa, parum doloris percipit. Nocte jam ipsa compluries urinam in vas immisit, qua in re tamen nonnunquam et lectum madefecit. Unde cognitum est, m. sphincterem vesicae, quamquam jam inciperet corroborari, tamen nondum eo usque valere, ut longius per tempus urinae impetu resistere posset. Urina, quamvis paululum esset mucosa sedimentumque valde purulentum deponeret, tamen jam multo liquidior erat, quam ante. Pulsus subinde perquam acceleratus jam leniorem se praebet. Praeterea aegrota nocte postrema sine Opii usu dormiit,

1) Hujus membranae propulsae descriptionem infra adjungam.

urethra tamen internoque vesicae pariete valde sensibilis, ita ut et catheteris immissio et decocti Altheae injectio etiamtum vehementes dolores excitarent. Qua de causa tum injectiones illas tum catheteris usum inde ab hoc die omitti placuit.

D. m. Sept. 24. Aegrota se bene habet, doloribus valde demissis febrique jam finita. Urinam femina jam eo usque continere valet, ut nisi in vas subiectum urinam non mittat. Semel tantummodo tempore nocturno tam subito urinae impetu oppressa est, ut lectum madefaceret.

D. m. Sept. 26. Noctu et sanguinis ex utero profluvium et dolor regionis sacralis vesicaeque urinariae ingruunt. Urinam tempore matutino jam aegrota voluntate emittere nequit, sed rursus ad catheteris usum confugiendum est, quo magna urinae valde purulentae quantitas emittitur. Tempore pomeridiano urina etiam sanguinis admixti vestigia ostendit, qua in re haec admixtio non demum urina vaginae introitum praeterfluente exstitit, sed jam ex vesica urinaria lotum per catheterem sanguine intermixtum fluxit. Pulsus non ita magnopere acceleratus est. Injectiones jam quatriuum omissas denuo institui placuit, nec non aqua Laurocerasi, cuius usus ex aliquot dierum spatio intermissus fuerat, rursus porrecta est.

D. m. Sept. 27. Noctu, ergo septimo post foetum expulsum die, placenta cum velamentis, idque cum sanguinis profluvio perquam exiguo, provenit. Placentae diametros 3'', crassitudo 3/4—4'' aequat. Urina etiamtum cum sanguine mixta est. Injectiones, quum aegrotae nimios dolores commoverent, omissae sunt.

D. m. Sept. 28. Tempore matutino aegrotam frigus

accessit, quod jam diei superioris tempore pomeridiano ingruerat. Pulsus in sexagesima jam nonages micat. Itaque, quum in uno eodemque homine tot res adversae conjungerentur, nempe uteri retroversio, cystitis, abortus, placentae per dies septem retentio, quoniam majore cautione opus erat, statim Chinini sulfurici gr. II, altera quaque hora assumenda, praescripta sunt.

D. m. Sept. 29. Febris non recurrit. Hoc die etiam pulveres quattuor porrecti sunt.

D. m. Sept. 30. Fibris quoque cessavit. Aegrota et doloribus satis caret et, urinae mittendae impetu ingruente, mictum eo usque continere potest, quoad vas ipsi porrigi queat. Musculum vesicae sphincterem manifestum est tonum suum nondum ex toto recuperasse, quod, simul atque urinae impetus exstitit, aegrota extemplo huic desiderio satisfacere cogitur, quod nisi fecerit, musculo protrusore urinae sphincteris vesicae vim superante, urina effunditur.

Kalendis Octobribus exigua lateris sinistri affectio pneumonica cum pulsu accelerato exorta est, quae phaenomena tamen, nonnullis cucurbitis cruentis indeque sinapismo applicitis, brevi evanuerunt. Ad postremum d. m. Octbr. 4 ad expectorationem adjuvandam mixtura Tartari emeticci in dosi refr. adhibita est, quae quum d. m. Octob. 6 iterum porrecta esset, usque ad d. m. Octob. 8 quaevis pectoris affectio cessavit.

Inde a d. m. Octob. 10 aegrota omni ex parte optime valet. Itaque ex lectulo jam surrexit ciborumque appetitu optimo ducitur. Genae rubescunt. Qua de re quum aegrotae propinquis nuncius allatus esset, eam jam domum asportari posse, aegra d. m. Octob. 18 e nosocomio avecta est.

Membranae ex vesica urinaria propulsae descriptio.

Membrana, pedem longa, dodrantem pedis lata, universim 1^{1/2} crassa, aliis locis tenuior, aliis, imprimis partem medium versus, crassior cernitur. Forma ejus ovata est; margines dilacerati. Membrana in aequam planitatem extendi nequit, quoniam pars media tum alteram partem versus prominere cernitur, ita ut membrana sacci figuram induat, qui undique laceratus non tamen adeo scissus est, ut in planum expandi possit. Tota membrana utrimque, at imprimis in altera superficie, urinae salibus obtecta est, unde fit, ut contrectanti arena crassiore inspersa esse videatur. Membrana, cuius in universum satis insignis spissitudo est, non ubique tamen solida apparet, sed hic illuc, praesertim in altero dimidio, perforata ac quasi distracta est. Quae foramina, portionibus tenuioribus magisque extensis circumdata, ita ut tendendo videantur exorta esse, diametro inter 1^{1/2} et 1/2—3/4 variantur, plerorumque tamen diametro aliquot lineas aequante. Quarum aperturarum nonnullas locis, quibus ureteres in fundum vesicae intrant, respondere, quamquam fortasse ita crediderit quispiam, tamen nequaquam certo demonstrari potest.

Superficies membranae altera, majore salium urinae copia obtecta, textura est satis aequabili levique, solummodo salibus illis in ipsa depositis aspera reddit. Hic illuc exiguae quaedam impressiones loquaque paululum depressa conspiciuntur, quae quidem tenuioribus membranae locis respondent. Salium copia ad membranae marginem major observatur.

Superficies membranae altera, quemadmodum jam

supra admonui, salibus minus aspera facta, ad texturam quod attinet, magis inaequabilis atque rimosa certitur, quippe quae locis paululum depresso atque prominentiis instructa sit. Tela ipsa in hac superficie in fibrillas tenuissimas, filis similes, prope ad telam cellulosa accedentes, atque in fibras maiores exit, quo sit, ut tota superficies speciem lanae coactae p[re]se ferat. In hac quoque superficie urinae salia maxime marginem versus accumulata cernuntur.

Tota membrana aut convoluta aut per longitudinem composita fortiusque compressa hoc loco crassitudinis diametrum $\frac{3}{4}$ " offert.

Disquisitio microscopica salia membranae adhaerentia fere sola phosphorica terbasica esse docuit, per paucis acidi urici crystallis passim dispersis. Iisdem crystallis tota membranae crassities trajecta est; quod tamen, quum tam exigua eorum in internis membranae partibus tum magnitudo tum multitudo sit, neque oculo inermi neque tactu cognoscitur.

Ad ipsam membranam quod attinet, jam investigatio oculis nudis suscepta nos suspicari jussit, eam non partem aliquam organicam esse, ex corpore expulsam, veluti vesicae urinariae membranam mucosam vel tunicam muscularem, sed potius exsudatum coagulatum nobis obversari, quoniam nullum ne minimum quidem structurae organicae vestigium in conspectum venit.

Quam conjecturam microscopii usus quam maxime confirmavit, quippe quo apparuerit, telam ubique crystallis tenuibus, oculo inermi non conspicuis, eadem, qua diximus, qualitate praeditis, penetratam fere totam prope ad massae illius aequabilis, glebulentae lanaeque coactae similis speciem accedere, quae fibrini vel

aluminis coagulis propria ac peculiaris est. Cellularum epithelialium nusquam aut in alterutra superficie aut in ipsa membranae textura interna ullum deprehensum est vestigium. Hic illic tantum exiguae fibrarum telae conjunctivae portiones cognosci potuerunt, sed fibrae elasticae vel solitariae ac singulae vel in tractus reticulatos collectae, telae conjunctivae intertextae vel cum ea decussatae, quales texturae membranae mucosae vesicae urinariae peculiares esse constat, nusquam repertae sunt. Ceterum fibrarum telae conjunctivae tractus in massa illa glebulenta non nisi singuli atque solitarii aderant, ita ut in quibusdam exsudati istius particulis microscopio submissis omnino non invenirentur. Nervorum vasorumque nullum animadversum est vestigium, sed tota membrana exsudati coagulati speciem p[re]se tulit, quod veluti massa omnino emorta ex organismo propulsum esset¹⁾.

Epicrisis.

Jam, si res singulas ad morbi historiam a nobis descriptam pertinentes diligentius consideraverimus, haec fere apparent.

Causa, ex qua uteri retroversio in hoc casu originem duxerit, neutiquam certo erui potest. Ex causis innumeris, quas diversi auctores quandam ad morbum istum proclivitatem efficere contendunt, nonnullas etiam in nostro casu vim exhibuisse quamquam non negaverim, tamen, quae illae fuissent, neque nos plane cognoscere neque ipsa aegrota referre potuit. Quod autem

1) Membrana nunc in hujus universitatis collectione pathologica exstat, ubi sub no 764 J. 47 asservatur.

ad causas occasioales spectat, quae effectum habuisse credantur, ipsa aegrota, tantum abest, ut quidquam certius attulerit, ut solum; quemadmodum jam supra admonuimus, nocte quadam doloribus in vesica urinaria perceptis se ex somno excitatam esse dixerit, quibus doloribus mox tum alvi dejicienda tum urinae mittendae molestiae se comites adjunxissent. Attamen, quanto temporis spatio post dolores istos primum perceptos hae turbae ingruissent, aegrota prorsus non meminerat. Qui rusticorum in his regionibus animum aequum ac torpidum cognitum habet, qui, quam illi negligentes parumque intenti sint ad corporis status observandos, haud ignorat, ei haud dubie non mirum erit, quod, quae ex anamnesi petita sint, tam manca atque imperfecta cernantur. Id solum aegrota sibi videtur pro certo affirmare posse, se usque ad noctem illam optimam usam esse valetudine.

Morbus, qui quidem ex quibus causis exortus sit, latet, brevi tempore phaenomena ipsum plerumque subsequentia, nimium alvi dejectionum mictusque turbas, provocavit, i. e. urinae faecibusque ejiciendis impedimenta opposuit, via mechanica ob urethrae intestinique recti compressionem utero dislocato effectam allata. Quod autem urina ab initio nisibus vehementioribus guttatum emitti poterat, id documento est, uterum principio quidem nondum cunei ad instar in situ suo ab normi haesisse, postea tamen quum gravitate sua ac magnitudine tum nisibus illis magis magisque ibi infixum esse. Quantum fidei vero illis seminae verbis adjungendum sit, quibus se per hebdomadum quattuor spatium urinam non misisse dixerit, per se intelligitur.

Operatione instituta, quod paulo post enuresis in-

gruit, id quidem facile est explicatu, si reputaverimus, quam diu et in. sphincter vesicae et totum vesicae collum in statu compresso distortoque fuerit. Quae debilitas paralytica, quamvis eam jam, antequam operatio fieret, ingruisse certum sit, tamen tum demum in oculos incurrire potuit, quum, utero in situm normalem restituto, urethrae compressio, quae ad id tempus adsuerat, finem cepisset. Quod autem enuresis brevi in completam ischuriam transiit, ejus rei causa non tam inde repetenda est, quod musculi sphincteris vesicae status debilitatus jam ex toto desierit, quam potius partim in eo est reposita, quod simul musculus detrusor urinae paralysi affectus erat, quae quidem, quum vesica urinaria per quattuor hebdomades tantopere expansa esset, facillime oriri potuit, partim et in eo quaerenda est, quod, quum membrana in vesica urinaria sita urethrae in vesicam introitui sese opponeret, mechanicum quoddam objectum est obstaculum, ne urina emitteretur. Ex eadem causa dolores gravissimi atque intolerabiles repeti possunt, qui in urinae mittendae nisibus inde a vesicae vertice usque ad ejus collum descendebant. Hanc enim mechanicam orificii urethrae praclusionem pro praecipua habendam esse causa, quae ad ischuriam efficiendam valuerit, vel inde appareat, quod ischuria tantummodo periodica erat, quae cum enuresi alternaret. Itaque tum maxime, quum urethrae orificium membrana occlusum tenebatur, ischuria aderat, dum, simulatque membrana loco suo mota fuerat, ita ut orificium liberum apertumque exsisteret, jam mictus non voluntarius, musculum sphincterem vesicae vim suam normalem nondum recuperavisse, ostendebat. Denique, membranam ischuriae causam attulisse, haec etiam res coar-

guit, quod, quum primum membrana expulsa fuit, ischuria finem cepit urinaque, quamquam non nisi breve in tempus, contineri potuit. Quod vero m. sphincter vesicae, quum paulo ante tam debilitatus videretur, ut urina guttatum emanare posset, tum jam adeo roboratus fuit, ut exiguae lotii quantitates continerii valeret, hujus rei causa in eo posita videtur, quod, quum membrana sibi foras viam aperuisset, stimulus, qui ad id tempus perpetuam ad sphincterem vim exhibuerat eumque ad inflammationis statum cum summis doloribus junctum redegerat, jam sublatus fuit. Namque haec ipsa inflammationis dolores excitans, si quidem causee nocentis effectus perdurat, satis frequenter organi alieujus functiones adeo turbare atque inhibere potest, ut illud paralysi affectum videatur, — dum in casu, de quo nos agimus, musculi spincteris vesicae paralysis vel debilitas paralytica jam primis post uteri repositionem diebus evanuisse potest, paralyseos symptomatibus solummodo nimia muscularum inflammatione irritatorum sensibilitate simulatis.

Quod autem nondum major urinae copia in vesica retineri potuit, inde repetendum videtur, quod musculus detrusor urinae, qui vel exigua lotii quantitate accumulata ad eam emittendam stimulatur, tunc tam eximia irritabilitate affectus erat. Jam, urinam modo regulari effluentem magis ad statum normalem redire necesse fuisse, consentaneum est. Hoc enim facto, inflammationis stimulus jam desit doloresque diminui necesse fuit. Ceterum dolores catheteris usu atque injectionibus etiam aductos esse, facile animo percipere possumus, quum apertum sit, indumentum epitheliale membranae mucosae vesicae, nec non, quantum verisi-

mile est, urethrae nondum regeneratum fuisse. Membrana mucosa, quum denudata esset epithelio, superficiem exulceratam praebuit, quae quum in eo esset, ut consanesceret, perpetuo in urina sedimentum purulentum repertum est. Quod quum ita esset, fieri non potuit, quin, cathetere immisso fluidoque injecto, partes exalceratae dolores commoverent.

Septimo, postquam ovulum provenerat, die, quum placenta resoluta esset, in aliquod temporis spatium dolores in regione sacrali vesicaque urinaria perceptos atque ischuriam redisse cognoscimus, quo accessit, quod urina jam speciem sanguineam prae se ferrebat. Dolorum regionis sacralis originem explicacione non egere manifestum est. Quod autem ad dolores in vesica urinaria perceptos attinet, eos verisimile est consecutivis muscularum vesicae laboribus effectos esse, quum membranam mucosam vesicae etiamtum sauciari, muscularum contractione in eam agente, dolores ejere necesse esset, qui quidem dolores, fieri potuit, ut per aliquod tempus continuarentur. Quae eaedem contractiones granulationes recentes ad sanguinem profundendum stimularunt. Dolores ad partum secundinorum propellendarum causa exorti per horas 24 durant, priusquam placenta prodiret; qua de causa, quum per tantum temporis spatium continuarentur, facillime ad consensum illum in vicinis vesicae urinariae musculari provocandum valere potuerunt. Quae musculari vesicae contractiones via secundaria excitatae facile eo usque accrescere potuere, ut m. sphincter vesicae, qui jam longius per tempus irritatus fuerat, spasmotice contraheretur; quam ob rem ad tempus ischuria ista exorta est. Ceterum, ut ingenuo profitear,

nunc, anno amplius dimidio, ex quo casum observandi occasio oblata est, transacto, non satis memini, utrum tum ad m. sphincterem vesicae ope catheteris vincendum majore virium contentione opus fuerit, necne.

Denique placenta expulsa, quum nullum amplius momentum adesset, quod ad vesicae urinariae affectionem vim nocivam haberet, perfecta convalescentia celeriter facta est. Pulmonum affectionem, quae eo tempore exstitit, per se adfuisse, neque cum malo, quod descripsimus, connexu ullo coniunctam fuisse, haud dubium videtur.

Jam si quaesierimus, quodnam nomen affectioni, de qua disseruimus, imponendum sit, eam cystitidem cruposam appellandam esse judicamus, cujus quidem processus talem fuisse arbitramur.

Uterus gravidus retro versus, quemadmodum semper accidit, fine suo inferiore urethram comprimeret eoque urinae retentio efficeretur necesse fuit. Itaque urina per longius tempus in vesica retenta, quum nunquam tota ejus quantitas, sed summum non-nullae guttae excernerentur, brevi decompositionem subiret necesse fuit, reactione alcalina maxime prevalentem, id quod non modo ex odore lotii acerrimo, ammonium redolente, verum etiam inde quam luculentissime appetet, quod ammonium forma salium phosphoricorum terbasicorum, quae toti exsudato adhaerebant, in conspectum se dedit. Pauca autem acidi urici crystalla, quae cum permagna salium phosphoricorum terbasicorum copia inventa sunt, mirationem nostram movere nequeunt. Urinam valde decompositam fuisse, hoc quoque documento est, quod productum cruposum semper sa-

libus urinae crystallinis amorphisque trajectum cernitur, id quod tum ex casu, a nobis observato, tum ex iis, quos ante attulimus, elucet.

Quam autem sententiam Kiwisch¹⁾ in comminatione supra laudata protulit, urinae decompositionem jam abnormi ejus secrezione in renibus effici, quod in ischemia irritatio per breve in renes propagetur in iisque commutationes provocet, quae ad secretionis anomaliam efficiendam valeant, ea utrum pro vera, an pro falsa putanda sit, equidem decernere non ausim. Certe, etiamsi viri docti sententiae non simpliciter subscribamus, tamen nos urinae decompositionem etiam ex longiore ejus stagnatione deducere posse judico. Zeitsch, quum in nervorum vesicae urinariae plexibus vehemens orta sit excitatio, etiam renum nervos in mali societatem vocatos irritatosque esse, eoque modovasorum capillarium in renibus sistema ad secretionem majorem incitari existimat. Quo irritamento per longius tempus durante, necesse esse statuit, secretionem sanguineam exsistere, quae urina, jam sanguinea secreta, in vesica cum muco, cujus copia solito major ob praesentem ibi irritationem secreta sit, commisceatur. Tum vero, urina ac sanguine mucoque sic inter se commixtis, brevi necesse esse, concrementa urinae subtiliora conformari, sane facile est intellectu.

Haec urina decomposita, cui nullum fere effluvium patebat, quum ejus copia perpetuo lotii aequa se de componentis affluxu augeretur, fieri non potuit, quin vesicae membranam mucosam, perpetuo eam contingendo, acerrime irritaret; quae quidem, quum inflammari

1) l. c. pag. 124.

coepita esset, indumento suo epitheliali denudata est. Quae epithelii membranae mucosae detrusio, licet a nobis directo observata non sit, tamen eo certius statui potest, quod in membrana postea propulsa nullum cellularum epithelialium vestigium repertum est. Ceterum haec strati epithelialis detrusio ad priorem affectionis periodum, multo antequam nobis morbi observandi potestas facta sit, referenda est.

Auctore Rokitansky, in inflammatione cruposa strati epithelialis detrusio tali modo evenit, ut, processu cruposo ineunte, fluidum aliquod serosum, membranae mucosae affectae epithelium liquefaciens exsudetur, quo facto, demum substantiae ad coagulandum aptae exsudatio succedere creditur.

Quo indumento epitheliali quum membrana mucosa exuta esset, tum inflammationis stimulus tum processus cruposus per longius tempus continuo durabat, membranaeque mucosae substratum, hoc processu corruptum, exsudatum plasticum in superficiem liberam ac denudatam exsudabat. Hoc exsudatum, quod tota vesicae urinariae membrana mucosa productum erat, postquam coagulatum est, membranam constituit, totam vesicam intrinsecus obducentem, quae initio membranae mucosae firmiter adhaerebat. Qua in re membranam, de qua diximus, si non toti vesicae superficie internae, saltem majori ejus parti respondisse, tum ex forma ejus tum ex magnitudine cognoscitur. Est autem membranae diametros altera unius pedis, altera opposita dodrantis pedis. Vesicae urinariae ambitum vero ab altero latere per verticem ad latus alterum versus metenti majorem esse, quam si a parte anteriore per verticem ad partem posticam emetiare, inter omnes constat, quoniam

vesica expleta a parte antica ad posteriorem magis compressa est, quam a parte dextra sinistrorum. Quod quum ita sit, manifestum est, membranam, quae et nunc non perfecte in planum extendi potest et praeterea in margine ab omni parte scissa est, tum, quum in vesica urinaria inesset ejusque parietibus adhaeret, sacci formam retulisse. Singulae, quae adsunt, aperturae parvae locaque extensa nescio an ex vera distractione repetenda sint, quae quidem distractio, quum exsudatum jam coagulatum esset, vesica magis extensa, eo facilius fieri potuit, quod, membrana jam conformata ac perfecta, magis minusve longo temporis spatio opus erat, priusquam illa detruderetur. Fortasse et loca illa tenuiora membranaeque foramina illis membranae mucosae vesicae urinariae locis respondeant, in quibus, quum forsan epithelium insularum ad instar remansisset, exsudatio minore vi facta sit. Ultra urethrae orificium, verisimile est, membranam non pertinuisse, quod per totum tempus, quo casus a nobis observabatur, catheteri liber transitus patebat. Quod enim in prima catheteris immissione a nobis instituta, cathetere muliebri fini proposito non satisfacente, virilis in usum vocandus erat, hoc inde pependisse videtur, quod, dum catheter prior justo brevior erat, alterius longitudine sufficit, ut exsudatum membranaceum ipsius aperturis obsistens loco moveret, ideoque urinae liberum introitum transitumque pateficeret. Eum fundi vesicae locum, cui ureteres inosculant, et ipsum exsudato obductum fuisse, nec certum nec verisimile est. Namque in membrana ipsa ex multis, quae adsunt, foraminibus neutiquam duo talia cognosci possunt, quae jure ureterum in vesicae fun-

dum introitibus respondere credantur. Accedit, quod, quantum mea fert opinio, proprius ad veritatis speciem accedit, qui membranam in posteriore vesicae urinariae pariete deorsum versus tantummodo ad ureteram in fundum vesicae introitus usque conformari potuisse crediderit, quod urinam continuo e renibus provenientem sibi viam inde ab ureterum introitibus usque ad infimam vesicae partem liberam servasse verisimile sit.

Ea membranae superficies, in qua major aderat salium copia, ad vesicae cavum conversa fuisse videatur. Ita enim rem se habuisse, non modo major, quae ibi deposita est, crystallorum urinae copia probat, verum etiam levior membranae ipsius textura. Superficies altera autem magis villosa hanc indolem fibrosam, lanae coactae similem, idecirco induit, quod primum cum vesicae membrana mucosa cohaerens postea demum ab ea disjuncta est. Quo accedit, quod in hac membranae superficie minor, quam in altera, crystallorum multitudo reperitur, quippe qui ex parte tumdemum, quum membrana jam resolvi coepita esset, ad hanc superficiem pervenire potuerint, quo quidem tempore eis non aequa, ac statu membranae recenti, huic adhaerescere licuit.

Hoc exsudato igitur coagulato tutante atque obtidente, epithelium recens formari coeptum esse verisimile est, quod tamen, quum membrana solveretur, neutquam jam perfectum fuisse constat. Quae exsudatio resolutio, teste Rokitansky¹⁾, ita perficitur, ut, postquam exsudatum statu coagulato aliquamdiu membranae mucosae adhaesit, sub eo humor viscidus, mucoso-pu-

1) I. c. Vol. II. pag. 57.

rulentus exsudetur, quo exsudatum, prius resolutum, denique omnino se jungatur.

Ad postremum, quum exsudatum e vesica urinaria expulsum esset, extemplo aegrotae statum in melius mutatum esse vidimus, quo facto, postquam, placenta ex utero propulsa, ultima quoque perturbatio hinc exorta cessavit, brevi tempore perfecta sanitas restituta est. Quae sanitas tum exstitit, quum membranae mucosae vesicae urinariae excoriations, quae hic illuc fortasse exulcerari coeptae erant, cicatricibus obductae essent.

Hoc dissertationis loco illum casum proponendum esse censui, quem jam ante dixi non tam multa casibus ceteris analoga offerre, ut unā cum illis exponi posse videretur. Est autem hic casus a Luschka descriptus.

*Quaedam de casu anno 1853 a Luschka
descripto excerpta¹⁾.*

Qui casus, a Dr. Bauer Reutlingensi²⁾ obser-vatus, a prof. Luschka respectu anatomico perquisitus, in archivio a Virchow edito uberioris descriptus est.

Femina quaedam, quum per tres hebdomades ischuria, quae ne cathetere quidem adhibito tolli vel saltem leniri poterat, laboravisset, quinto graviditatis mense mortem occubuit. Etenim, quum necessarium fuisset, vesicae urinariae punctionem institui, duodecim post

1) Necrose der ganzen Harnblasenschleimhaut von Prof. H. Luschka in Tübingen in: Archiv für pathol. Anatomie etc. herausgegeben von R. Virchow, Vol. VII fasc. I pag. 30.

2) Medic. Correspondenzblatt des Würtemberger ärztlichen Ver eins 1853, Nr. 51, pag. 408.

operationem diebus exactis, aegrota, febris typhosae chronicæ symptomatibus mortem comitantibus, vita decessit. Cadaveris inde sectione facta, haec inventa sunt.

Uterus, cui foetus omnino recens fere viginti hebdomadum inerat, nihil obtulit, ex quo ipsum ullius processus morbosi participem fuisse suspicari liceret. E contrario solam vesicam urinariam id organum esse compertum est, in quo affectio sedem habuisset. Quae vesica quum aperta esset, pus odorem foetidissimum diffundens provenit, neenon membrana occlusa, saccum capacem, eadem, qua vesica urinaria est, forma ac magnitudine praeditum, efformans reperta est. Urethrae in vesicæ collum introitus fere omnino clausus erat. Porro, vesicæ membrana mucosa prorsus deficiente, tunica muscularis partim inoperta, partim substantia quadam caseosa coloris sordidi flavique obtecta cernebatur.

Membrana expulsa, colore ex griseo flavo imbuta texturaque lanae coactae simili praedita, in ambitu anteriore foramen subrotundum, margine nigro circumdata, obtulit, qui quidem color niger ab acus triquetrae cannula repetendus erat. Interior sacci superficies aliis locis omnino levem, aliis urinae sedimento tectam se praebuit. Aperturæ ureterum in vesicæ fundum introitibus respondentes in sacco jam internosci nequierunt.

Huic sacco urina infuerat, quae, quum catheter immissus in spatium inter saccum tunicamque vesicæ urinariae muscularem interpositum devenisset, illius ope non potuerat emitti. Auctor igitur in ea est sententia, ut urethrae in vesicam introitum exsudato conclusum indeque vesicæ sic paeclusae membranam mucosam resolutam esse censeat.

Disquisitione ope microscopii suscepta, cognitum

est, membranam e vesicæ urinariae membrana mucosa ex toto detrusa cum tela conjunctiva submucosa, nec non e magna multitudine fasciculorum tunicae muscularis vesicæ, in externa membranae superficie positorum, consistere. Porro solita membranae mucosae vesicæ elementa, telae conjunctivæ massa, fibris elasticis penetrata, practereaque vasa ac nervi inventa sunt. Telarum epithelium nusquam ullum deprehendi potuit vestigium; in superficie membranae interna membrana mucosa partim inoperta, partim urinae crystallis obiecta fuit. Totum membranae stroma massa quadam exsudata trajectum erat, cujus massæ elementa paecipua e moleculis adiposis, cellulis nucleos continentibus granisque permagnis congregatis, colore fusco tinetis, constabant.

Auctor in relationis suae exitu morbi naturam processum diphtheriticum fuisse ait, quo quum exsudatum inter elementa vesicæ membranam mucosam constituentia depositum esset, haec membrana jam nutriti nequierit, qua re exemplo necrosi affecta atque detrusa fuerit.

Discrimina, quibus casus modo expositus a prioribus illis maximopere differt, haec sunt.

Primo malum non post uteri retroversionem existiterat, sed uterus potius, cadaveris sectione facta, omnino integrum sanumque se exhibuit, causa, qua morbus effectus esset, omnino non cognita. Deinde morbus ipse ab auctore non processus cruposus, sed diphtheriticus dicitur, quod vir doctus jure ac merito sic statuit. Tum hoc in casu neque exsudatum coagulatum neque membranam mucosam exsudato infiltrata

tam per urethram foras expulsam esse, sed in vesica urinaria remansisse videmus. Denique hic casus a reliquis maxime eo discrepat, quod exitu letali fuit.

At nihilosecius tamen hujus quoque casus nobis rationem ducendam esse existimavimus, quod processus diphtheriticus cruposusque certe inter se cognati sunt, quodque tum in hoc casu tum in ceteris processus morbosus ad unum idemque organum pertinuit. Ceterum me casui a Luschka descripto haudquaquam tantum ad rem meam gravitatis attribuere, quantum casibus reliquis, hoc vel inde satis elucet, quod de eo non eodem cum illis ordine, sed seorsum ac separatim agendum esse duxi.

Ad casum a Baynham prolatum quod attinet, qui tantum cum conditione quadam, atque, ut ita dicam, a Zeitsuchs commendatus huc trahendus videbatur, ea, quae necessaria esse judicavi, jam, quo loco de illo disserui, commemorata sunt.

In ephemeridibus a viro celeberrimo de Siebold editis, in quibus commentatio haec reperitur, id quod doleo, allatum non est, utrum ea translatio sit, an epitome scripti anglici dijurnis Edinburgensibus inserti. Ceterum perquam est verisimile, ad verbum e scripto anglico versam esse, quoniam, si epitome foret, ejus, qui retulisset, nomen adferri oportuit.

Haec ego commemoranda esse censui, quod, quamquam opera data, ut idoneis certisque argumentis innixus sententiae a Zeitsuchs de casu Baynhamiano latae aut adstipulari aut repugnare possem, tamen ephemerides anglicas adire non contigit. Secundum commutationem germanice scriptam, quae in ephemeridibus

Sieboldianis inest, facere non possum, quin sententiam a Zeitsuchs prolatam amplectar.

Denique hoc admonere liceat, secundum meas investigationes Zeitsuchs pro eo viro docto habendum esse, qui omnium primus ejus modi morbi historiam in medium protulerit. Verumtamen in eius enarratione diligentior membranae expulsae disquisitio, id quod vehementer dolendum est, desideratur.

T h e s e s.

- 1) Sententia a Simpson proposita, quo partus diutius duret, eo magis matris periculum augeri, pro vera habenda est.
 - 2) Nemo cruribus rectis nascitur.
 - 3) Exstat vagitus uterinus.
 - 4) Unica conditio, ad vagitum uterinum necessaria, in velamentis diruptis reposita est.
 - 5) Medicus obstetricius surdus inutilis est.
 - 6) Femina non modo, dum infantem lactat, sed etiam aliquot post lactationem menses coitu abstineat oportet.
-